



眨眼间，夏日就杀到啦！学生哥仔放假，便要开启“逛吃逛吃”模式啦。可乐君最近发现，商家们为留住“为食猫”胃口，真係绞尽脑汁，各出奇招！快啲跟住我睇下呢啲新奇到爆嘅美食，你最想试边一种呢？

烧腊/文 烧腊、黄译萱/图 黄译萱/摄

为食猫都爱！ 骑呢美食大赏



“窿窿鞋”香喷喷

广东人有多爱“窿窿鞋”（即洞洞鞋）？落雨、出街、上班，一对洞洞鞋全程通用！但你绝对唔知道，我哋老广竟然连“洞洞鞋”都食落肚！喺广州潮流圣地之一嘅江南西，有间“富贵食饭公司”，将洞洞鞋同鸡蛋仔玩Cross-over！大家用12蚊就可以食到24码嘅“拖鞋鸡蛋仔”，造型逼真，仲帮你配埋可爱“鞋花”，一睇就想“咔嚓”影相发朋友圈。店家用香浓蛋浆现烤，只要等四分钟，热辣辣、香喷喷嘅“窿窿鞋”就新鲜出炉！趁热咬一咬，成个鼻息都係蛋香味。拣芝士味嘅话，每一咬都会有拉丝效果。唔止咁，店家仲会推出“火箭龟龟包”，绿色嘅龟仔面包夹住两条肠仔，表情呆萌到爆，得意到令人唔舍得食。呢个包三层超有料，上层係脆皮菠萝包，中间有鸡扒同肠仔，底层面包松软，“碳水炸弹”入口饱肚兼满足。食完“窿窿鞋”又食“龟包”，啱晒颜值控心水。



龟苓膏竖有龟

喺广东美食界，一直流传“老婆饼冇老婆，煲仔饭冇细路仔”嘅搞笑说法，但龟苓膏里面，真係有龟！去到天河甜品老店“韵姐甜品”，一定要食一碗清热解渴嘅龟苓膏。呢度嘅龟苓膏，除咗用真材实料龟壳熬制，上面仲放咗只Q弹到爆嘅“乌龟”！轻轻一拈，龟仔就“Duang Duang”震，可爱到犯规！龟苓膏本身係下火良药，配上秘制顺滑炼奶，初食落去有啲苦，伴有淡淡草药香，但食多两啖，口感爽滑细腻再加上回甘滋味，最啱夏日清凉解暑。



华夫饼可晾晒

想食潮流新鲜嘢，少得“潮到风湿”嘅东山口！最近火到爆嘅“FIVEMATE”奶茶店好易认，无论店嘅装修修定出品，全部都係绿色系嘅，让人一秒穿越东南亚。店内最受欢迎嘅“斑斓竹篮华夫饼”，竹篮造型加上清新嘅斑斓绿，靓到唔舍得食！食客们仲脑洞大开，用竹竿当衣架，将华夫饼挂起身影，氛围感拉满！睇落清新嘅华夫饼，食落有斑斓清香和华夫饼酥脆，最后融入表面撒上的糖霜，风味独特，口感丰富！饮品都超有心思，搭配同色系嘅“恐龙熔岩杯”马黛茶，上层香蕉味棉花糖加入milo粉，可味嘅茶香啱会太苦，双重口味“夹击”，饮起身顺滑到好似“德芙巧克力”，正到冇朋友！



羊村狼堡闪现

“喜羊羊与灰太狼”迎来20周年大日子，“羊村”“狼堡”齐齐放大招！近日，“MieMiePop喜羊羊与灰太狼气泡水”快闪店开设在上海愚园路，气泡水甜到入心，每个角色都有Colorful嘅特调，听店长透露，“喜羊羊”专属嘅“蓝天白云QQ弹弹青草草原”特调最受受欢迎。扮成“懒羊羊”和“小灰灰”嘅朋友正举杯同屋顶嘅“喜羊羊”合影，糖果色空间变身多巴胺羊村，唔少粉丝专登cos角色来打卡。羊村卖萌，狼堡来一波情怀，“灰太狼”嘅狼堡出咗积木版，从“灰太狼”嘅实验室到“红太狼”嘅宝座，每砌一块积木就论起一段剧情。“喜羊羊与灰太狼”玩跨界，二创热度飙升，令大家感受到纯粹嘅爱和真挚嘅友情。重点来了：快闪店即将杀到广州，我哋可以期待夏日嘅羊城同“喜羊羊与灰太狼”相遇。




童年三巨头

陪你从细玩到大



“你可能唔认识我，但我创作嘅动画片一定陪你走过童年……”近期呢条火爆嘅转场视频，瞬间唤醒无数人嘅回忆，炸出广东人嘅童年“三巨头”：《喜羊羊与灰太狼》《猪猪侠》《熊出没》。呢“三件宝”好活跃，电影、潮玩、主题乐园佢哋样样有份，呢个夏天又有诸多新搞作，真係陪大家从细玩到大！



“熊出没”再出没

作为“贺岁档钉子户”，“熊出没”每年都出没！“熊出没”系列大电影从未断过，“光头强”同“熊二”嘅森林闹剧，已经升级成“科幻五部曲”，从2020年开始，每年上映一部，直到2025年的《熊出没·重启未来》，震撼视觉效果直逼“漫威”作品，剧情更是赚足三代人嘅眼泪。“熊出没”打造咗3座主题乐园，把动漫IP搬到现实。睇江西宜春方特熊出没乐园里，球幕飞行影院带你“飞翔”，跟“熊大”“熊二”飞越白雪山、鲸鱼岛等《熊出没》经典场景；1:1实景还原嘅光头强木屋更成为打卡热点，个个游客争住坐位嘅烂沙发。睇浙江台州临海熊出没欢乐港湾里，动感环幕影院带你“重返地球”，去2022年嘅大电影中冒险。去年8月，宁波熊出没欢乐港湾乐园开放，呢度设有主题街区、水上乐园、港湾酒店，一家大细都啱玩，这个夏天可以去同“熊大”“熊二”打水仗了，凉爽到爆！

